

Tutarithi Vitu Vyote

Yeye ashindaye atayarithi haya, nami nitakuwa Mungu wake, naye atakuwa mwanangu—**Ufunuo 21:7.**

Ili kuweza kurithi vitu vyote, lazima tuipege na kuishinda dhambi.

Tunaweza kuwa na furaha katika Bwana ikiwa tutazitunza amri Zake. Ikiwa tuna wenyeji wetu mbinguni kwa kweli na nafasi kwa urithi usio na ukomo, utajiri wa milele, basi tunayo ile imani itendayo kazi kwa upendo na kutakasa nafsi.... Tu wanafamilia wa familia ya mbinguni, wana wa Mfalme wa mbinguni, warithi wa Mungu na warithi pamoja na Bwana Yesu. Wakati wa kuja Kwake tutakuwa na taji ya uzima isiyochujuka.

Mfalme wa mbinguni angetaka wewe umiliki na ufurahie yote yanayoweza kuadilisha, kukuza, na kuinua nafsi yako na kukufanya ufae kukaa na Yeye milele, uwepo wako ukiwiana na uzima wa Mungu. Maisha yajayo ni taraja lililoje! Yanavutia jinsi gani! Upendo wa Mungu unaoneshwa kwa mwanadamu kwa upana, kwa kina na pasipo kipimo jinsi gani!

Fursa walizopewa watoto wa Mungu hazina kikomo—kuunganishwa na Yesu Kristo, ambaye, katika ulimwengu wote wa mbingu na ulimwengu ambao haujaanguka, anaabudiwa na kila moyo, na sifa Zake zinaimbwa kwa kila ulimi; kuwa watoto wa Mungu, kubeba jina Lake, kuwa mshiriki wa familia ya kifalme; kuwekwa chini ya bendera ya Mfalme Imanueli, Mfalme wa wafalme na Bwana wa mabwana.

Mwana wa Mungu ndiye mrithi wa vitu vyote na utawala na utukufu wa falme za dunia hii zilitolewa Kwake. Kama alivyokuwa Yesu duniani, ndivyo walivyo wafuasi Wake. Ni wana wa Mungu na warithi pamoja na Yesu; na ufalme na mamlaka ni vyao.

Mahali pa ulimwengu, Atakupatia wewe, kwa ajili ya maisha ya utii, ufalme chini ya mbingu zote. Atakupa uzito wa utukufu wa milele na maisha ambayo ni ya kudumu hata milele.